

## **Ehuhuo-Ozi Ibuzo** **Pita** **De** **Pita, Nke Ibuzo**

<sup>1</sup> Mmẹ wu Pita hun wu onye-ozu pu-ichen Jesu Kristi de ehuhuo-ozini jenni ndi nke Osolobue rileni ulo, hun risonme ali ichen-ichen ri Azuun Pontusu le Galeshia le Kapadosia le Eshia le Bitinia— <sup>2</sup> ndi Chuku Nedi hoto hun Mmon-nso don nso—keni we hun uzo humeni Jizosi Kraisti isi, leni we wuru ndi we fekpu edeke e—a ri we ochan. Efo ma le udon ya ri ni onu mmagi-mmagi.

### *Olile-nya Hu Ri Ndun*

<sup>3</sup> Ojija-mma ya ri ni Osolobue, hun wu Chuku le Nedi Onye-nwonni-enyi wu Jizos' Kraisti! O gigu oken omiken e mudonzi enyi, mu enyi ye ime olile-nya ohun ri ndun. O me ihienni ebe o no gha onwun weni Jizosi. <sup>4</sup> O meguo enyi wuru nwan ndi k'e nwehen ihien ndi hun o donmetoni enyi, ihien ndi hun ghaleni e rehi mobu a ruhu mobu a fapu. O buguo ihien ndini toni unu ime elu-igwee. <sup>5</sup> O gi nwan iken o gi wuru Osolobue e cheme unu, ghahani okukwe onu, keni nzuofuha hu o kwademe guu, hun lalani ogugu-ogen, hun uzo ru onu eka.

### *Osolobue Gi Afunfun E Lele Okukwe*

<sup>6</sup> Ihienni Osolobue me ri nwan e me unu a ghoghoho—osun'a ni we ri nwan e gi afunfun ri ichen-ichen e lele unu ekere ogen, <sup>7</sup> igi ghosi ni

okukwe unu wu nke ezigbo e. Erira ke we e gi okun e lele goru makeni o ri mkpa—goru hun e wiwini! Bu okukwe unu ka goru mkpa a ri, ka a ohunma-ohunma! Ya wu, o rika mkpa ni we lele okukwe unu, keni ogen Jizosi k'e gi bia, a ja we unu mma, yezikwo unu ogho le mgbaye; <sup>8</sup> Jizosi hun ihien e ri a suo unu—osun'a ni unu e ke leghatu e; unu kwerin'e—o sun'a ni unu ari nwan e legha a kikenni. Ohun e me unu a ghoghohoda-oda—oken ighoghohonu ghaleni a saeka a kowa! <sup>9</sup> Unu a ghoghohoenina makeni unu hu e nwonhen erere ri okukwe unu—ya wu, we hu a zuopuha ume-ndun unu.

<sup>10</sup> Nke nzuopuhani, ndi-amuma hun Osolobue gi ku oku efoma hun jenkod'e ru onu eka te chokenme ali a, donrin enya leban a enya ebe we n'a cho ni we ghoha a. <sup>11</sup> We hu a ju enwen we ihien Mmon Kraisti ri ime we ri e ku oku e ogen o gi gwato we afunfun Kraisti k'a ta le ogho k'e son n'e—a ju enwen we onye o ri e ku le ogen o gi jenkod'e gi me. <sup>12</sup> Osolobue no ghosi we ni ele ifiri we le enwen we ke we gi e ku ihien ndi ahun we ku, kani, ifiri unu. Unu a nuguonwan ihien ndi hu. Onu ndi ahun weheni unu ozioma ke unu gha nu we. Iken Mmon-nso ahun Osolobue gha enu-igwee zihewe ke we gi zi unu ya wu ozioma. Ndi mmon-ozinke a chokade ni we leghade ihien ndini!

### *We Kpo Unu D'e Bi Obibi Ri Nso*

<sup>13</sup> Ya wu, konrin ni nwan orun ime obi unu, e donrin enya e bi; buchanrin ni olile-enya unu che ngozi hu Jesu jenkod'e gi efoma a weheni unu—ogen o k'e gi bia. <sup>14</sup> Leke ezigbo umu hun e hume isi, emezile ni ihien ndi hu te ri a gun unu ogen unu

keleni marin Jizosi. <sup>15</sup> Kama, obibi unu ya richanrin nso uzọ ile nọke ke Osolobue hun kpọ unu don ri nso. <sup>16</sup> Makeni Ekwkwo-nso si, “Ri ni nso, makeni mme nwen ri nso.”

<sup>17</sup> Ebe o me ni Osolobue hun ghalenị egbeyeni onye owule ke unu a kpọ Nedi unu—Osolobue hun e gi ihien onye-onye me e kin e ikpe—gikwo ni nwan egun e bichanrin ogenni hoduni unu k'e bi elu-uwani unu wu itumunye.

### *Kẹ Wẹ Dọn Gbapuha Enyi*

<sup>18</sup> Unu a maringwo ke Chuku don gbapuha unu ime obibi-eti hu unu gha eka ndi muni unu nwehen; ni ele ihien e wiwini rike egbo ona (siva) mọbu goru—ke we gi gbari unu, <sup>19</sup> kanj, edeke hun rikenme mkpa—edekere Kraisti, hun ri ke nwa-ebulu ehụ a zu oke nwonleni orusi. <sup>20</sup> Osolobue a hotogwo a ni Osolobue d'e ke uwa, o ru ogen ikpazuunni, o no nwan wepuha a ifonrin-ifon make orinimma unu.

<sup>21</sup> Unu a ghagwo nwan eka Kraisti bia d'e gi Osolobue don enya, Osolobue hun gha onwun weli Kraisti, ye Kraist' ogho. Ya wu ni Osolobue ke unu kwerini; Osolobue ke unu ri e lee enya.

### *Onye Wẹ Gbafuha Nke-esi E Nwe Ezigbo Ihien- osusuo*

<sup>22</sup> Hunni unu chanchanguu nwan ume-ndun onu ghahani igbaye ezioku Osolobue, ihien onu ile kwerini k'a sa nwan eka a sotari ibe onu. Ya wu, gi ni nwan akpakali-obi unu e nwe ihien-osusuo ibe unu. <sup>23</sup> Unu a wurugwo ndi we mudonzi. Ele mkpuru we gha a mu ihian hun a nwunni ke Osolobue gha mundonzi unu, kama, mkpuru ghalenị a nwun ke we gha mu unu. Mkpuru ahun wu

oku Osolobue—oku ri ndun, hun a to jenin ejen.

<sup>24</sup> Makeni, Ehuhuo-nsọ si,

“Ihian ile nohu ke efifia;

oghọ ile ihian nwon nohu ke obobo efifia.

Efifia shinwun, obobo a danpu!

<sup>25</sup> Kani, oku Onye-nwonna-enyi  
jenko d'e turu jenin ejen!”

Oku hu wu ozioma hu we zi unu.

## Isi Nke Ebuo

### *Omuma Hu Ri Ndun Le Ebon Hu Ri Nso*

<sup>1</sup> Ya wu, wepu ni nwan udi eje-ihien ile ihian gi e son ibe e, ero ile, ihunnai, iwe-nya le nkuto ile.

<sup>2</sup> Rike umu we mu nke ohun, a ni ni ekpiri mirin-eran ime-mmom hun ri ochan a do unu—keni unu hun uzo a ra a, e gi e e sue ime nzuopuha unu, d'e ru isi e, <sup>3</sup> o me nwan ni ezioku ro ni unu a danminguo efoma Di-nwonna-enyi, hun a ni Di-nwonna-enyi ri mma.

<sup>4</sup> Unu a biaguo nwan d'e kunrun e: omuma hun ri ndun—hun ihian ju; kani omuma we hori ahori, ri oken mkpa, k'o wu nya Osolobue. <sup>5</sup> Ime e, onye-onye ime unu wuzikwo omuma ri ndun. Noke omuma ndi ri ndun, o hu e gi unu a tun ulo ime-mmom, keni unu hun uzo wuru ndi nchu-ejan ri nsọ, hun gha eka Jizosi Kraisti a chu ejan ime-mmom hun Osolobue a nabanhan. <sup>6</sup> Makeni, Ehuhuo-nsọ e kuguu a, si,

“Lee n'e, m ri e buto omuma ime obodo Zayonu,

omuma gin'e;

omuma m hori ahori, rikenme mkpa.

Ifenren emeko onye hun kwerini n'e.”

<sup>7</sup> Ya wu, omuma hu ri unu mkpa oda-oda—unu ndi kwerini; kani nke ndi hun kwerileni—  
“Omuma ndi ri a tun uno jutọ,  
a wuruole hun gi ulọ!”

<sup>8</sup> O wuruguzi

“Omuma w'a kpogburu;  
nkume a han we a dan.”

Makeni agbayeni we oku hu, ya hain we gi kpogburu—ke we don deto ni we ya.

<sup>9</sup> Kani, unu nwen wu agbo Chuku hori ahori; ndi nchu-ejan Eze; ebon ri nsọ; ndi nke Osolobue—keni onu hun uzo e me onye owule a marin oken orun ri ichen-ichen Osolobue runsomme, Osolobue hun kpouha onu ime ishi bu unu che ime ukpe e rigbu enwen e mma. <sup>10</sup> Ogen mbu, unu “ele ndi nke Osolobue”, kani, unu a wuruole nwan ndi nke e; mbu, “omiken e eruni unu eka”, kani omiken e e ruguo nwan unu eka.

### *Enyi Wu Igbon Osolobue*

<sup>11</sup> Ndi ri m obi, m ri a rio unu noke ndi obia le ndi rileni ani we, gbala ni ni egun ndi hun a gunsomme ihian hun a luson ume-ndun unu agha. <sup>12</sup> E bi ni obibi kuru-oto ime igunrun ndi ali ndi ozo ri ichen-ichen kwerileni; keni, osuon'a ni we e kuja oku unu noke si unu e me eje-ihien, we k'a gha a hun obibi-oma unu—e gi w'e ye Osolobue ogho ogen o k'e gi bia.

### *A Gbaye Ni Ndi Ri A Kini*

<sup>13</sup> Gi ni ifiri Di-nwonna-enyi e hume ni ndi ile ri a kini isi—ke eze, hun wu onye-isi ndi okiki, <sup>14</sup> ke ndi Govano ri Azuun ichen-ichen a ki—noke ndi eze zi d'e ye ndi e me eje-ihien afunfun, a ja ndi me ihien

ri mma mma. <sup>15</sup> Makeni uche Osolobue wu ni unu gi ime ihien furuni kpukin ndi-nzuzu ri e ku ihien we marinleni onu; <sup>16</sup> e me n'e ke ndi wulen igbon makeni unu e nwenringuo enwen unu; ka egikwole ni inwonrin-enwen unu kpu enya, e me eje-ihien, ka bi ni ke ndi wu igbon okpuru Osolobue. <sup>17</sup> A gbaye ni ihian ile; e nwe ni ihien-osusuo ndi Itu-Kraist' ibe unu; a tu ni egun Osolobue; a gbaye ni eze.

### *E Leri Ni Afunfun Kraisti Ta*

<sup>18</sup> **Ndi wu idibo mọbu igbon**, e weluachanrin ni enwen unu ali ebe ndi unu ri okpuru we ri, a gbaye we uzo ile—ele ndi-efoma le ndi eka-alulua suo, kan ke ndi eka-iken. <sup>19</sup> Makeni, ihien w'e gi ja i mma ro omeni y'e meni eje-ihien, e ye we i afunfun furulen ni we ye i bu y'e gi ifiri Osolobue dingbu ufu a. <sup>20</sup> Ki wu erere i n'i dingbu ili we gbu i, omeni eje-ihien i me ke we gi gbu i ya wu ili? Kan, omeni y'a ta afunfun makeni i me ihien ri mma, bu y'e digbu e, Osolobue k'e gi ifiri e gozi i. <sup>21</sup> Ya ke we kponi unu; makeni Kraisti tazikwo ni onu afunfun, lato ni onu ihien unu e leri, keni onu hun uzo e son nzom'uku a.

<sup>22</sup> O metuni njo;

oku-ndufie aghatun'e onu puha.

<sup>23</sup> Ogen we gi kpari e,

o kparigwarini we;

ogen o gi ta afunfun,

o nyanni isi n'o k'e me ihien owule.

Kama,

o no we enwen e

kwan Osolobue,

onye hun a han ezigbo enen.

24 Kraịstị lẹ enwẹn ẹ gi ẹhụ a buru njo ẹnị, bu ẹ shi elu obe osisi ahun, keni ẹnị gi ẹhụ a nwunnahin njo, gi ndun ẹnị memẹ ihien Osolobue cho. Ẹhụ wẹ rusonmẹ ẹ ke ẹnị gi nwe nzuori. 25 Unu te ri a kpahu ke atunrun, kanị onu e kinhenguo nwan, buru onye hun e du umen-dun unu rike anu, e chemẹ ẹ.

## Isi Nke Ẹtọ

### *Di Lẹ Nwunye*

1 **Nwunye**, mezikwo erira. E humeni di i isi, keni, osuon'a ni o nwegho ndi di kwerileni oku Osolobue, e gi we omume nwunye we dohanhan we ime Osolobue—bu o nwonni oku we gwa we; 2 makeni di i k'a ri a hun ke i don ri e bi ohunma, e gi egun Osolobue e bi.

3 Anile ni mma unu wuru nke ehụ—mma icho ntutu mma le iyi goru le iyi ekwa ma mma. 4 Ka ni ni mma unu wuru hun ri ime obi, mma ahun ghaleni a fapu—mma ime-juu le agungun omehen—hun rikenme mkpa enya Osolobue. 5 Enina ke ikpoho ri nsọ hun gi Osolobue e don enya don cho enwen we mma mbu-mbu ghahani ihume ni ndi di we isi. 6 Erira ke Sara don gbaye Ebrahim, a kpo a “nna-m.” Unu wu umu a ikpoho o mekwọ ni unu e mesonme ihien ri mma, ni unu anini egun ihien k'e meni unu kusị unu.

7 **Ndi di**, erira k'o rizikwo ebe onu ri. Di, gi uche e son nwunye i—a nyanhan ni okpoho ka alulu a ri; e ye ẹ ogho makeni o nwezikwo ndun ohun hun Osolobue e ye ofe ke yu nwen don nwe. E me ni enina make odakin owule gha a ri ekpere unu.

*Ita Afunfun Makeni I Mę Ihien Ri Mma*

<sup>8</sup> Nke ikpazuun, **unu ile**, a wu ni ohu ime mmon; onodi ibe onu ya e metu unu; a ni ni ihien ibe unu a suo unu rike umune; e nwe ni obi alulua; e wenua ni enwen unu ali ime obi unu. <sup>9</sup> Emegwarikwole ni ihian eje-ihien mobu kpogwari we iyi. Hun nke unu e gi megwari we, gi ni ngozi ku we ugwo, makeni ngozi ke Osolobue kponi onu, iya k'o cho eka unu.

<sup>10</sup> Makeni Ehuho-nsọ si,

“Onye cho ndun,

onye cho ni elu e ri mma,

ya wefu eje-ihien ire e;

ya wepuzikwo oku-ndufie ugb'onu a.

<sup>11</sup> Ya gbakito eje-ihien azuun—

mesonme ihien ri mma;

ya choma udon,

chusonme e.

<sup>12</sup> Makeni,

enya ri mma ke Di-nwonna-enyi e lee

ndi e me ihien o cho,

ntin a rizikwo ekpere we.

Kani,

eje-enya k'o lee

ndi e me eje-ihien.”

<sup>13</sup> Onye k'a sa nwan eka me unu ihien owule omeni unu wu ndi e me ihien ri mma? <sup>14</sup> Kani, osuon'a ni unu ta afunfun makeni unu me ihien Osolobue cho, ya wu ni ndi Osolobue gozi ke unu wu. Atule ni nwan egun we; emehunmele ni. <sup>15</sup> Ka yechanrin ni Kraisti onodi run'e ime obi unu noke Di-nweni-unu, unu a kwademe ogen ile ni onu a kowan onye owule k'a ju unu ihien hain unu gi nwon olile-enya unu nwe. <sup>16</sup> Ka e gi ni nwayo le



mgbaye e me ẹ. E donme ni obi unu ochan, keni ifenren me ndi hun e kuto omume oma unu ri e me ime Kraisti.

<sup>17</sup> Make ni o ka mma ni ihian gi ifiri ihien ri mma o me ta afunfun, omeni uche Osolobue ro, kari ni ihian gi ifiri eje-ihien o me ta afunfun. <sup>18</sup> Make ni, Kraisti gi ifiri njo tazikwo afunfun, nwun; mgbe ohu k'o nwun, o nwunkozi, Onye ri ochan hun nwunni ndi njo onwun—keni o hun uzo wehe enyi ile ebe Osolobue ri. We gbu ẹ, o nwunhun ke ihian don a nwun, kanj Chuku no me ẹ ri ndun ime-mmọn. <sup>19</sup> Ogen o gi ri ime-mmọn, o no jen d'e zi ndi-mmọn ri ime ngan ozi oma— <sup>20</sup> ndi hun gileni oku-Chuku we gwa we don ogen mbu, ogen mbu ahun Osolobue gi ri e din ndidi e che; ogen hu Nua gi ri a tun ugbo-mirin hu. Ndi we gi ya wu ugbo-mirin zuopuha ebuni oda, ya wu, we ri madu esato suọ; mirin ahun ke we ghaha zuopuha we. <sup>21</sup> We gi onwan gwato enyi ke mirin-Chuku hun we gha nwan a zuopuha unu kiken ni no. Ele ni w'e gi mirin-Chuku a wupu unyin ri ihian ehụ, kama, ihian gi ẹ a ghosi Osolobue ni o gi obi ẹ ile bia d'e kunrun ẹ. O zuopuha unu make ni Jesu gha onwun lihi. <sup>22</sup> Jesu Kristi a lashiguo nwan elu-igwee; o nodi nwan ekanni Osolobue; ndi mmọn-ozi ile le okiki ile le iken ile ri nwan okpuru ẹ.

## Isi Nke Ẹnọ

### *Obibi Ndi We Gbehutoquu*

<sup>1</sup> Ebe o me ni Jizosi narin afunfun noke ihian, gun ni nwan agungun ohu hu o gun, unu e konrin ime obi onu. Make ni, onye gi ifiri Kraisti kpachanpu

ẹnya narịn afunfun ime ndunni a jụgụọ njo— 2 a ra bizi n'o me ihien ndi hun a gun ihian, kama, o bi ndun a hoduni enu-uwa ke Chuku don cho.

3 Ogen unu tuhu ogen mbu ebe unu ri e mesonme ihien ndi hun a suo ndi ghaleni e fe Chuku usuo e higu. Rike we, unu te ri e bi obibi ifenren ogen hu, eje-ihien a gunsomme unu; unu a ra manya a tu, e me eje-mmemme, e jen ogbo manya, onu a ru mmom onu a marinzi hun unu ruako.

4 O tuka we nwan ẹnya ni unu arizi e son we e bi obibi ahun na iwi—we hu e gi e e kuja oku unu. 5 Kani we jenkọ d'e ye Osolobue mgbako—Osolobue hun ri nwan e che ni ogen ru n'o kin ndi ri ndun le ndi nwunni ikpe.

6 Onwan hain we gi zizikwo ke ndi nwunni ozioma, keni we hun uzọ ri ndun ime-mmom rike Osolobue, osuon'a ni a naringuo we ikpe-omuma, nwun ke ihian.

### *Ke We Don A Run Orun Osolobue*

7 Ihien ile e d'e ru njendeme; e kwodon ni nwan enwen unu, a wu ndi ghaleni e gi okukwe we e gu egu. E me n'e make odakin gha a ri ekpere unu. 8 Hun kachanrin mkpa, e nwe ni ihien-osusu ndi Itu-Kraist' ibe unu ogen ile, makeni ihien-osusu e kpume njo bu oda. 9 E gichanrin ni obi unu a nabanhan ibe unu iwe unu—e denwinwinle ni. 10 Rike ezigbo ndi-nlepu ẹnya, hun Osolobue meni efoma yesonme oyiye ichen-ichen, onye-onye ime unu ya gi oyiye o nwehen aka Osolobue e yeni ibe e aka. 11 Onye owule hun e kuni, ya ku ihien Osolobue ku—rike onye Osolobue gi e ku; onye owule hun a run orun owule ya gi iken Osolobue ye

ẹ rụn a, kẹni ọghọ hụn ọzọ a bja ni Osolobue ime ihien ile ghahani Jesu Kristi. Ogho le ikẹn ile wu nke ẹ jẹnrin ejẹn. Iseẹ.

*Ita-afunfun Nọke Onye Nke Kraisti*

<sup>12</sup> Ndi ri m obi, anikwole ni oken afunfunni unu ri a ta, hun we gi ri e lele unu, tu unu enya nọke si ahunlele ro. <sup>13</sup> Ka ghoghoma ni, makeni unu ri e son Kraist' a ta afunfun a—kẹni unu hun ọzọ nwe ighoghọ, e yi oro-ighoghọ ogegho a k'e gi puhachanrin ifon.

<sup>14</sup> Omeni we gi ifiri Jesu Kristi kpari unu, onu a wuruole ndi Osolobue gozi, makeni ohun ghosi ni Mmon ahun nwe ogho hun wu Mmon Osolobue nokwasị onu. <sup>15</sup> Ka emekwole ni ndi ri a ta afunfun make eje-ihien we me—make igbu-ochu mobu izu-ohin mobu makeni ihian wu eje-ihian le n'o me eje-ihien we gi a cho ihian mobu ni ihian a chosonme oku.

<sup>16</sup> Kani, omeni y'a ta afunfun makeni i wu onye Itu-Kraisti, ewerile ẹ ihien-ifenren, ka ja Osolobue mma ni ri a za efan hu, ni ri a za “Onye nke Kraisti.”

<sup>17</sup> Makeni, ogegho e ruole hun okinkin-ikpe e gi bidon —bu o k'a gha ime ulo Osolobue bidon. O me nwan ni okinkin-ikpe k'a gha eka enyi ndi nke Osolobue bidon, kini ri e che ndi nupu ni ozioma Osolobue isi? <sup>18</sup> Ozozị,

“Omeni nzuopuha fu ndi ezi-omume orun nani k'o k'a ri ni ndi-njo

le ndi ghaleni e fe Osolobue?!”

<sup>19</sup> Ya wu, ndi hun ri a ta afunfun—udi afunfun hun wu uche Osolobue—we we nwan enwen we che eka Onye-okike hu hun furu w'e gi don enya; we mesonme mma.

## Isi Nke Isen

### *Ndi-isi Uka Le Ndi We Keye We Lefu Enya*

<sup>1</sup> M ri nwan a riọ ndi-isi ri ime unu—**m ri a riọ unu** nọke onye-isi ibe unu le onye gi enya a hun afunfun Kraisti ta le onye ri ndi k'e nwehen ogho ahun lalani; dodo ni, <sup>2</sup> e lepu ni atunrun Osolobue hun we buche unu aka enya; e du ni we. Arunle ni nọke si we wa a ye onu olu, ka shiapu ni efo run a—nọke ke Osolobue don cho; egile ni ekpiri ihien unu k'e nwehen me e, ka me n'e makeni irun ni Osolobue orun ri a du onu. <sup>3</sup> Emele ni ndi we keye unu lepu enya nọke si unu nwe we; kama, a wuru ni ni we ihien-neri, <sup>4</sup> keni, ogen Onye-isi ndi-ndu atunrun e gi bia, unu e nwehen okpu-eze ogho ahun ghaleni a fapu hun o k'e gi tu unu ugon.

<sup>5</sup> Erirazikwo, unu ndi ri ibe ali, ndi hoduni, e humeni ni ndi-isi isi.

Unu ile, e welua ni enwen unu ali ebe unu le ibe unu ri e me ihien. Makeni, Ehuho-nso si,  
 “Osolobue a nokin onye-mpache uzọ,  
 kani,  
 o me ni onye e welua enwen e ani efoma,  
 e yen'e aka.”

<sup>6</sup> Ya wu, wenua ni nwan enwen unu ali che okpuru Osolobue hun nwe iken hi-ogbe—keni ogen ru, o bushi unu elu—<sup>7</sup> unu e bu mkpa ile unu nwe kwasị a, makeni orinimma unu ri a obi.

<sup>8</sup> E donrin ni enya; e che ni nche—makeni enenren onu wu Ekwensu ri aghahunme nọke eworo ri e deni, a cho onye o k'a nwun ri. <sup>9</sup> Chekenme n'e nwan ogun! E turukenme ni ime okukwe onu—ebe o me ni unu a marigho ni ndi Itu-Kraisti

ibe unu ile ri uwa ri a tazi udi afunfun ohu hu.  
<sup>10</sup> Kani, unu taguu afunfun ekere ogen, Osolobue hun e mecharin efoma ile, hun kpo unu d'e du e nwonrin ogho-itebite ahun ri ime Jizos' Kraisti, k'e donzicharin ni unu ihien, me unu turu, me unu ze, me unu nodicharin ohunma, obi e rucharin unu ali.

<sup>11</sup> Iken ile wu nke e jenin ejen! Isee.

### *Ekele Ikpaunun*

<sup>12</sup> Sivanosi\*, ya yeni m eka de ehuhuo-ozini me ekere; nwene enyi m weri n'o furu onye we gi e don enya k'o wu. M de e keni m gi e gba unu ume, gizi e ku ni onwan wu ezigbo efoma ahun Osolobue me ni ihian; turukem me ni ime e.

<sup>13</sup> Uka ahun ri Babilonu, hun we hori ke we don hori unu, e zigho ekele unu. Nwa m wu Maki e keleghozikwo onu. <sup>14</sup> Dide ni ibe onu odide ihien-osisuo.

Udon ya ri ni unu ile hun ri ime Jizos' Kraisti.

---

\* **Isi Nke Isen:12** Iya wu Saikasi.

**Elu Ọhụn: Ekwkwọ-Nsọ (Azụn Ọhụn rịn'a)  
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

**Copyright Information**

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

**The New Testament**

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 21 Feb 2024 from source files dated 29 Jan 2022

31b0248e-272a-5dee-8226-bcc00c54d9b1